

5563.7
4055



晚
休

75

Sales of dupls (1862)

晚休堂文集序

或有問於余曰育英之世
才不借於異代板蕩之
際士皆足為忠烈乎余應
之曰不然生此英材之衆

多闕於時運之盛衰展以
忠烈之表出間於千百人一
人烏可以易言之哉客曰
有人於此平海人姓黃諱貴
成字致章晚休其號也與

西庄柳先生居鄰有素才

器充擴矣當時龍蛇之

影余嘗為先生佐幕希遂年輔

國建功真將軍何次耶余

於是却跪而咨曰猗歟壯哉

是言之發也余擾事南
北無有廣覽請嘗叙之
公鍾山嶽之氣局江海之
量蘊抱迷野之跡願效補
衮之忠不幸尸官於瘴夷之

亂世適擇拔於先生之一幕
惟大義貞忠奮激于天地
之間壯猷奇權特出乎百
萬之中而方其黃塵漸迷
八域瓦解白刃誓蹈萬甲

取
忠
肅
公
集
卷
之
三
三
腦藏時先生奉 命宸

衷為國重任賢良才俊薦

擇為從如李忠武權元帥

外禦水陸亭廢晉洪宗祿

護軍從事器量任適需

用隨宜至如將軍延月相鄰
里義理之所膽無所隱也
恢廓之綽略有所受矣於
國家有瓜牙之士於先生有
識人之鑑而提其目之翽以忠

直極嘉尚於左右之置民之
悅而咸歸不日足於輸採之
役況又大駕西渡獨與先
生陪終个里死生一心臣子之
分至矣于時忠武公南海一

捷實關我國安危之機而
及其星隕南營哭都振海危
地急境凜如秋霜而收屍
治喪善護觀於攘掠之路
其正大之容雄略之器柔

可元矣惜哉公之詩曰大同
江水正滔滔激慨之志正如三
壯士之詩云長江之水流湍
湍之意也而袁安之流涕未
乾祖述之擊手楫歌斯此豈

非忠烈之心出於素性而著
於詩者乎其壯蹟泯焉
英名醫爾其麟臺真狀其
誰省淺龍濟夜月不死精
靈在天其必乎理豈然哉實

爲子孫之餘熾士林之慷慨
也適茲余於南州下車東府
作宰矣公之後孫鍾呂持一卷
文集而請余以叙余於百世
之下欽仰者久矣略叙如右

以俟後之君子

歲辛亥肇夏下澣

通政大夫常制使行

大都護府使東萊

鄭翊朝叙

御製詩集卷之六

御製詩集卷之六

御製詩集卷之六

御製詩集卷之六

御製詩集卷之六

晚休堂文集目錄

卷之一

詩

到平壤感憤成一絕

憶李統制

舜臣

晚休堂成和權友

缺可

晚休堂又與權友占一聯

歸家後省墓宿對鳳菴

暮秋與權友遊對鳳菴

二首

書

答舍季

漢成

附西厓先生手札

記

亂中記事

對鳳菴記

上樑文

對鳳菴上樑文

雜著

遺誠

卷之二

附錄

傳來事蹟

家狀

行狀

墓碣銘

墓碣陰記

晚休堂傳

記事後敘

書行狀後

益陽書堂開基祝文

益陽書堂移建記

益陽書堂重修記

益陽書堂落成韻

跋

晚休堂文集目錄

終

晚休堂文集卷之一

詩

到平壤感憤成一絕

投筆操弓手亦高大同江水正滔滔
他時露布王城下欲挽銀河洗此刀

憶李統制

舜臣

當年弓馬出西方誓水盟山語必詳
此去閑山千里外誰能爲我運籌堂

晚休堂成和權友

鼓可

晚休臺上晚休堂題扁晚休也不妨
積苦風塵還自

憊微勞佐幕便相忘莫將弓劍時時彈最愛芝蘭個
個芳遙望 楓震何以答洛東江水入心長

晚休堂又與權友占一聯

勝日偷閒步此臺趁余取適故人來欲知上下無窮
理魚躍鳶飛也察哉

歸家後省墓宿對鳳菴

覆雨覆霜歲月忙禪樓暇日我懷長曾陪杖屨遊千
里一洗干戈淨四方喉沾菊露詩書馥面頰松濤枕
簟涼傍人勿謂將軍某韜晦無名出處場

暮秋與權友遊對鳳菴

二首

秋盡山齋子與吾鳳凰不至一禪枯覆地紅夢新涼
動滿酌黃花宿病蘇舊面溪山千恖過重光日月萬
年呼九成峯下聽韶館喜有兒孫讀典謨

芹池秋日曝松塔夏陰寒管此藏名客時來不厭看
書

答舍季

漢成

搶攘中存沒茫然得奉情墨欣感交至憑審萬恖餘
生近作舊樓之人慶幸曷喻室人之病素來積崇多
年奔竄中尚保一樓固莫非吾弟勤謹周徧之賴而
弼兒失學憂之何及病人生逢之願情理固然而何

幸敵焰幾熄去畱無礙耳

以下
錢

附西厓先生手札

三灘之別尚戀戀耳歸後復用連吉恒用耿結此
中姑依喜幸曷勝就邊憂未畢君遽告歸公私之

錢何可勝道也塞鴈

下
錢

記

亂中記事

余生長窮巷常抱孤陋之恨癸酉秋始拜西厓柳先
生于河上廬次先生不以慵愚而外之收置門下首
授以周禮司徒之教自是往來承誨積有年所矣當

壬辰四月往候于墨寺洞京第十三日倭兵犯入釜
山浦十七日早朝邊牒卒至自備邊司特薦先生爲
體察使時邊報陸續不絕賊兵已過密陽漆谷殆近嶺
底云先生曰今吾受任於艱險之地而擢君以佐幕
任勿卑小官無念妻孥共力王事同歸死生於意何
如且知人最難而君之出入吾門下近二十餘歲知
君之心爲忠且信識君之勇爲強且毅每事周徧無
窘束壞鼓處足以當大事任要職而方荷不責發程
不遠軍官中探知之任最難得其人君其爲我先發
可也對曰旅食京邸當此判渙之時孰無保軀命戀

妻子之心而陪於是遊於此者爲先生眷愛之恩欲報其萬一者也鄙生性雖蒙愚豈以艱危之勢私自逃生變其夷險一節而棄先生於千萬賊數中耶且死生有命家孥之存沒逃遁不足掛念而但國步艱難先生方受重任爲公保私竊有所望而雖以淺智殘勇隨事補給終始如一是一區區之願也將卜日發行時先生在中樞府卽治行事先生謂余曰募致軍官君自擇定先發令下軍官願從者二十餘員翌日方試才於樞府前庭都巡邊使申砵以武士不肯從不得發請謁先生通刺後見先生召募軍官甚多

顯有不豫之色先生卽以軍官單子授送○慶尙左
兵使金誠一爲本道招諭使咸安郡守柳崇仁爲兵
使先是金公自日本還言倭兵不動與黃允吉所言
大不同先生問曰君言旣如是萬一有變將柰何金
公曰吾亦豈料其終不動但稍解民情八字在傍親
聞者詳矣及是時上以某之言解人心誤國事遂
有拿致之命俄而上知金某收得本道士民心命
赦其罪因拜招諭職時先生書報往復余輒奉行金
公辭甚慷慨諭余以勉國事勤討賊之意心竊感服
矣至是有下獄之令竟得蒙放之命不勝幸賀○巡

邊使申砮屯兵忠州敗績而歿砮有將畧而素有自恃輕賊之意嘗來謁先生於私邸論用兵臨戰之策言甚輕易先生明其不然砮終不省悟而去至是不守烏嶺之險而退陣于彈琴臺致此溺沒之敗先生知人之鑑推此可服而申砮之輕賊致敗可勝歎哉四月三十日曉車駕將西幸平壤請兵天朝自領相以下皆有扈從點出之命而獨先生無所命政院啓扈從不可無柳某於是令扈行時京城堅守之論從中出萬口和附姑未決俄而巡邊使李鎰狀啓夜至車駕卽時而發自景福宮前哭聲一時

滿城中雖丈夫剛腸不忍見不忍聞也先生顧謂余
曰 車駕之西幸在所不己臣子之陪從尤爲得當
而君之於我但同鄰之誼佐幕之分也以吾之故涉
險濱危而至於斯耶余對曰一諾尚存必無餘恨且
職任雖殊爲公一也况 國勢如此陪先生同死生
已淩於平常時豈以千里平壤爲中道反改耶伏願
先生勿復憂慮隨事量處分付施行以便公私卽隨
車駕踰沙峴到碧蹄驛雨大注 上停駕驛舍卽
出至臨津雨勢不止日旣昏渡江入東坡驛越翌日
夕次于開城府太平館臺諫以首相交結誤國事劾

奏至初二日朝 上卽遞首相以先生持差一行羣
情莫不洽然越七日過中和入平壤○六月十一日
車駕向寧邊時先生以唐將接待事畱于平壤是
日賊攻城急卽時分排諸軍官各守門樓及大同江
灘先生與左相及元帥并登鍊光亭俄而有紅衣賊
見亭上有人暗以鳥銃窺點漸至沙岸放丸以地步
之稍遠故竟不及余時在防牌內望見賊勢數多如
林而覘其軍律不甚威壯卽以片箭射之五巡所傷
頗多又令軍官姜士益等十餘人從後射之矢及岸
上賊畏縮而退去○七月先生病痔甚苦臥不視事

余甚憂之食飲藥餌等節無不干攝而症甚添劇爲
公泣私茫不知所出自 行在送內醫詮症特賜熊
膽蠟藥至四五調服症少差復明日卽起視事羣情
抃賀○十三日方以糧餉接濟爲憂適牙山倉米一
千二百石來泊定州立巖地先生不勝喜幸卽發遣
守門將康士雍及余馳往督運當日到泊于安州○
十九日遊擊將史儒中丸卽死先是祖承訓至義州
史儒以其軍卒爲先鋒將祖本以遼左驍將往者北
虜之戰累有軍功至是大言倭可拚取行至嘉山營
問我人曰平壤之賊今果屯據否對曰賊兵方畱突

擊無數承訓卽於是日夜三更發兵進攻平壤時大雨適至城上無守堞之倭先鋒卽馳入七星門內道狹而傍多委巷馬不得展足而行軍不能成伍陣勢急窘東俄忽之間烏銃聲發飛丸如雨下史遊擊卽致斃軍馬死者亦不知其數承訓遂退陣以餘兵還過順安肅川夜至安州欲前阻江路以備遏故其急遽如此先生謂余往慰其志兼送酒饌余使辛從事奉饌後至先馳走控江亭承訓爲兩所沮畱己四五日卽以先生命固挽承訓露處野中衣甲皆沾濕斷不可畱還軍遼東余還白先生先生恐此時人心潰

繞卽以畱安州待後軍之至啓請于 行在○八月

聞 天兵出來之報先生預令於三和龍岡等邑急
輸米豆一千六百石分置順安肅川此等邑民丁盡
在行陣老弱多竄許多之穀恐未得及時齊到從事
官辛慶晉得疾委痛不能奔走檢敕乃命余往督及
期竣事而還○九月十日隨 車駕至定州不數日
幸宣川命先生守定州營先生送 駕伏路左因從
延薰樓上望見有荷杖自四面而來者不知幾許人
矣先生急呼余往探之卽行覘之數雖顆而跡甚殊
常卽追捕懸首於倉街其餘賊望風解散由此得全

定州倉穀宣川龍川鐵山諸邑劫倉者亦熄○嘉山
郡守沈信謙走馬急來所告內本郡儲穀頗優而官
廳有白米一千石以此欲餉天兵今已不幸事至
於此願少畱鎮撫賊不敢犯民不能動矣時信謙不
能令其下獨先生所帶軍官五六人所收潰卒二十
餘人矣信謙欲藉此自護故云先生以無上命不
敢擅畱遂別行至曉星嶺回望嘉山郡中已亂信謙
果失倉穀而逃○時久不雨江灘日縮上命宰臣
禱雨於檀君箕子東明王廟終不雨先生謂尹相曰
此處水漲無船賊不可渡探其水上淺灘處先使防

備如何尹相曰彼李潤德之輩難可倚仗獨李元翼
可任然難獨任以黃貴成兼送如何因命余守灘與
從事洪宗祿等十餘人同出城向博川行在繼援
將李幼澄以平壤近賊數有辭職之意先生明責其
不然先生以唐將迎接次將向嘉山至大定江邊望
廣禮院野有散卒連續不絕而來先生疑平壤陷沒
命余往追探之卽以單騎馳行至廣通院二里餘適
逢落後者十餘人詰其所從來乃義州龍川等邑軍
赴平壤守灘者也聞厥所傳則賊從王城灘兵使李
潤德遁去云自不覺驚愕矣卽馳馬回報先生先生

曰或傳者誤耶更探以來余卽回馬直抵大同江岸
果如傳言先生大驚卽時寫狀顧余曰此狀與他狀
有異君其往無畱滯急報 行在以來卽與軍官崔
允元急時發向博川是時 天兵搞糧恐艱乏先生
將向郭山至其山城下有一歧路當前先生問余曰
向來郭山遵大路往來今日之行日急如此故從間
路直行不意遽當歧路吾不知從此向何處乎對曰
鄙生前日往來每由此路從左則直抵郭山從右則
乃到龜城不遠也先生卽馳馬謂余曰曾聞龜城儲
穀頗優而吏民離散故輸運無路云君與洪宗祿并

江宗祿曾謫居龜城已協民心以君之勇畧加彼之
忠實招諭散民輸致倉穀固不難也十分慎處爲之
也卽時拜謝而行宗祿臨發似有慨然不豫之色余
謂曰爲謫邑而再作是舉故有此等氣像耶已收敘
爲司饗職更何慨然耶遂與宗祿巡行山谷以諭曰
方今賊兵已入平壤天兵方到定州平復之路可
指日以期而但所急者犒糧也本邑儲峙果如所聞
而輸運無路汝等亦主民也當危急之時竄伏圖避
義不忍也自今無論品官人民吏胥同心戮力斯速
輸致于定州嘉山果如吾諭則卽啓行在後有褒

賞有一人從林木間來問曰將軍自行在邑而來乎賊兵果屯平壤天兵亦果到定州耶曰然俄而繼尾而至者不知其數於是發倉穀以給擔負者繼續不絕先生賀余曰此邑支供賴君之力○十一月冬寒轉深先生深慮財力益竭軍卒疲頓回復之期將致緩晚晝夜焦思命余馳往江上候天兵消息○時賊兵已犯入咸鏡道者亦甚衆多王子亦陷賊中侍臣及該監司柳永立該兵使韓克誠等皆被執云報草自行在至于各營莫不落膽失色先生私自親往探賊適是時有倭學通使咸延虎者來謁

先生詳陳北道事機行長清正分道而發行長向平壤而清正入咸鏡道先生因命余此下永立等皆脫

身還行在果如所傳衆莫不驚愕矣○十二月

天朝大發兵以提督李如松爲大將率三營將張世爵楊元李如栢及南將駱尙志吳惟忠王必迪等渡江兵數至四萬餘先是經畧宋應昌贊畫劉黃裳袁黃駐節遼東合軍渡江十三日至安州時提督在東軒先生將入謁論事余亦陪其後先生袖平壤地圖以進○癸巳正月天兵已到肅川先生隨其後提督使副總兵查大受往順安給倭奴天朝今已許

和沈遊擊且至倭喜使小將平好官率餘衆出迎沈
遊擊總兵誘與許飲因縱擊擒平好官自後倭知兵
至大相擾亂提督方日昇彎弓鳴弦直馳入順安諸
營連續追進翌日朝進圍平壤先攻普通七星門以
大砲火箭發之聲動天地余卽馳告駱尚志吳惟忠
合率以進兵倭不能支走入內城中以銃丸亂發壁
穴間由是我軍及 天兵多被傷者余急走告提督
曰賊兵潰散餘存者旣入內城是所謂陷穽之虎勢
似盡劉而竊念窮寇致死機不可測兵可少退城外
以開走路如何提督從之倭果夜遁李提督彈劔鳴

鼓直上鍊光亭先生及諸軍帥隨其後設宴陳樂至
夜三更風旛正動月色方明諸軍帥次第奏凱提督
辭以未盡討平不許時命余干涉守灘軍夜渡行過
江渚適發杜甫行劒外之懷感題一絕寫呈先生先
生微笑曰此時詩興誠不偶然古所謂壯士而詩人
於君得見矣○提督進至坡州與賊戰于碧蹄驛南
阡頭旋屯于開城府先是提督欲追賊兵謂先生曰
吾方進軍而聞前路無糧穀藁草云極為憂慮爲國
事不憚勞惟在議政一人可促行備待無有窘束先
生卽辭而出余亦從後提督呼余謂曰此去京城不

滿二百里而賊兵旣敗於平壤退屯各處者其數難
算又聞我之進必是要路隱伏以設馬陵之機君其
先我候探與議政詳察日以馳報時大同江南天
兵先鋒已發槍戟塞路固不可行陪先生從間路疾
馳夜入中和轉至黃州所經驛舍皆空虛城邑亦甚
蕭條進退之間計難得當遂命余移文于黃海監司
柳永慶使催運糧草自海營又轉移文於平安監司
李元翼趁卽調發金應瑞軍不堪戰者自平壤負戴
而至黃州又令各邑儲峙自相輸致船運而至未嘗
闕之余自海營還至黃州畱所卽馳報提督曰小將

奉命至黃州姑未趁期牒報者非誠意之不足黃州之穀已失於賊兵之來往畱屯調發各邑之儲粟輸致於大軍之前到邑今纔旋歸奉命時探問賊兵屯事聞於開城人來者所經村邑無賊兵屯結之患而自坡湍以東賊兵尙此屯聚云云此非小將之目擊姑不可專信而想其勢已挫於平壤戰敗之後豈敢拒塞於天兵長驅之路偃然結陣於近地列邑也哉但一嶺間在路右而地勢險阻林木邃密雖千萬之衆可容隱伏不能遙度故使人覘其有無幸無一倏隱伏之患龍川以東開城以西雖鳴鼓徐行不足

慮也牒報提督進兵于開城府當是時倭將清正據于威鏡道惟玄蘇平行長平義智等遁散各處而在京之賊聞平壤之報憤不得其情殺掠京城之民燒盡公私廬舍而江西列屯之賊咸萃于京師謀拒

天兵之來路自沙峴以北屯壁相接牢不能犯云時提督自開城入後遽有遲回之意累日不發重違我先生懇囑進至坡州有此碧蹄之敗噫勝敗兵家常事豈無彼升此除之理耶今日之不幸抑有所不然者當是時也肅將天威輕敵之心發於連捷之後眼無一個金倭畱置其大軍獨與家丁善射者千餘

馳赴我將高彥伯副將查大受竟以後軍之未至致
死傷甚衆可勝痛哉○提督遂還坡州至夜渡以家
丁親信者死痛哭神氣亦大有不豫色至翌日朝卒
發退軍東坡之令先生及右議政俞泓力爭其無退
提督終不回惑元帥金命元及余乘間以白曰首相
之力爭義固然矣豈可遽動天兵以助敵氣乎且
勝敗常事願提督垂察焉提督默然良久姑爲徐答
曰吾之退屯東坡者將休吾軍以進爲計耳是日三
營一時還到臨津屯于東坡又翌日欲轉退開城先
生泣血固爭終不肯旣而跨馬遂還開城使總兵張

世爵召先生論兵事時先生在坡州遊擊將周弘謨將入倭營旗牌而來使諸臣及先生請入參拜先生獨不應走馬還東坡弘謨言狀提督大怒使三騎急追從者皆落後獨余及金霽辛慶晉隨之過至青郊驛提督將欲挐致先生適因李慶之實告卽止○先生命金敬老與高彥伯李時言等追截京城之賊託以無軍徘徊不前體府決杖督令前進方在坡州等處尙復逗遛命余促來○三月七日在東坡忠清義兵將李山謙來到開城見唐人言先擊南路則京城之賊自潰唐人告于參將參將招山謙問計貽書於

先生先生答書極贊其策之妙卽命余率軍人十名
護送 天將與山謙○四月十九日遂進軍至東坡
宿于查大受軍幕蓋賊已約退兵故有此上京之計
也越翌日京城復 天兵將入城諸大臣及先生隨
其後余亦陪侍而行登駕峴望見城內有一瓦屋蕭然
獨立直馳入乃小公主宅也迎提督於是第禮訖諸大
臣次第退先生亦退出聞於城內遺民則賊兵前一
日出城云嗚呼 國家之厄會一何至於此前日櫛
比廬舍皆爲灰燼所滅遺民存者百無一二行至
宗廟前先生痛哭諸大臣莫不號泣而失聲先生詣

提督館下問起居願發軍急追賊兵提督以漢江無
船爲言先生使人報備船狀俄而李如松率萬餘兵
出江上忽稱足疾而還。井邑縣監李舜臣素以忠
節瞻畧顯名一世辛卯二月自 上有擇將之命先
生特薦爲全羅左道水軍節制使李公曾有雅分於
先生來往頗頻余亦累往幕府爲所信任心服其忠
壯至戊戌十月提督劉綎再攻順天賊李公秉勝至
南海界又破賊船中丸而歿一軍皆哭聲振海中訃
聞滿朝莫不愛惜其材器先生尤極痛哀卽命余馳
赴喪所與公侄堯芬等治喪送輿人民設祭挽車而

哭○宣傳官金星報同郡人也早登第而有材器先生嘗奇愛之余亦往來承接者雅矣及其超薦爲平安虞侯 朝廷將遣人嚮導 天兵先生薦星報

上特命遣之不幸而致歿哀哉○前義禁府都事曹好益募兵江東得數百人出陣祥原遇賊多斬獲冬至日率士卒望 行在痛哭其忠義激勵如此○時嶠南急報日聞而家信寂然耿耿不己僂信自無何來千里西邸一尺家札足以蕩滌旅愁况搶掠賊藪大小家眷竄伏山林僅免凍餓此吾季之智計過人也欣豁何可盡道○十月 車駕還都先是沈惟敬

此下缺

○丁酉八月京城上流防守器具粗備後巡審

江華海島江華則申敕水使李思念措置又命余赴海島瞭望○時賊兵已皆南下分屯於江上自蔚山至于東萊金海巨濟複屯相結至十餘屯或依山而築城或憑海而掘塹以爲久畱之計 天兵畱屯於星州善山居昌慶州而相望不進 朝廷聞賊兵屯海邑下旨督諸將追賊兵都元帥金命元巡察使權慄合聚於宜寧義兵將郭再祐高彥伯亦皆附會而已諸將各自散去金命元權慄李資崔遠等先向全羅道金千鎰崔慶會黃進等向晉州賊兵隨至圍之

戰數日黃進中死軍人氣奪賊兵入城內千鎰
登臺石樓與慶會攜手痛哭投江而死 朝廷聞而
哀之以千鎰爲義死 贈議政府右贊成 天將悉
還京師先生隨 天將行至屏山館雪寒猝酷連畱
二日不得發余從問白於前曰從先生同出沒戰塵
者已到累禩幸荷 天朝再造之恩復京城返 王
駕而但邊憂未霽 天兵又向京城再舉之期不知
其幾個月而先生今日之行係是 國家重大之職
固不得已也 天恩罔極以若庸愚除之以定畧之
秩感祝之誠無以圖報幸賴先生汎愛之私恩逖矣西

士卒無償敗而歸轉到湖南以至於此莫非天也日
後論功酬勛之典非佐幕之任所可冀及而馮唐已
老之歎李廣難封之恨恒切但歲色迫近歸思正緊
先生之西行固所義也而至於小將今日之還無關
於國家再舉之期亦無憾於先生佐幕之道伏願
先生許歸鄉里先生曰丈夫之行積於終始臨路分袂豈
不惜哉對曰俄聞家奇妻病彌篤情理所在斷不可
已况經亂之後返巢之初調服之道不見是圖也且
人命脩短固難測知生時永訣是所望也特賜放歸
以敘情理如何先生終不給由夏以舍季書奉示極

請先生曰八年塵埃頭鬚共白進亦同退亦同道理
當然而情迫如此固不可挽君其歸武登曰雪路稍
通日氣頗溫遂發至丹山秣馬犒軍余乃入謁楊經
理麻提督帳下拜辭經理提督召先生以問曰黃貴
成之材畧姑未需用戰伐之場而料事頗優量敵甚
熟難可更得其人方今敵鋒未掃先自告歸何也先
生對曰其家所處不得挽執退出私幕隨後而出先
生裁書遺之曰君之歸必先過河隈以傳此書臨別
猶不勝悵缺之懷轉向三灘津而餞日已昃矣步出
橋頭陰雪始泮路冰如油馬不得着足跋涉而行至

村前巋然一閣依舊而立使奴完石先入通奇時妻

患已劇魂迷不省人之出入遂高聲而呼絕一舉目

而熟視終無一言而逝時則己亥正月二日也

今錄

洞草譜故
校時載之

○鄰居權友缺可者吾童年竹馬之交與

余弟經亂逃竄互相救助聞我之還來慰曰子之生

離死別之變誠極痛迫生時永訣尤切奇異勿爲損

傷焉吾家之禍慘不忍向他人言者也八年之內老

母之喪家婦之憾繼出於林木間凍雪之中朝夕莫

奉之節慘痛之懷胡忍提說尤有所痛迫者三霜已

過俱未襄空最是入子家父之哀痛切迫處也今子

名播於弓馬之塲生還於瘡痍之世豈非幸耶余答
曰君家之運何其厄也吾今日之痛非徒爲老妻哭
也滿眼光景莫非滄桑都不如無言○先生手札來
到奉覽○所居草堂本是狹隘而久爲風雨所壞遭
變之後又爲殯幕晝宵之間容膝甚難僂召匠而謀
之一朔之間構數間屋宇甚精間爲老夫晚年休息
之所極爲稱情權友曰有堂而無號亦一欠事且知
君之平生固莫如吾吾且名之因以晚休二字題其額余笑
曰題額甚猥濫而名義者固當曾與權反園棊鼓琴
之句示余曰構拙不足以稱吾子之事業余曰主人

此下
多缺

當先占而君先唱之誠美矣我且和之權友誦之曰
經亂之後志尚何其壯也○江上有巖廣如一小選
又有一澄潭鱗鱗之族往來卯育於巖穴之間以爲
盤桓釣遊之處自先世居於是釣於是名以爲釣臺
及歸依舊巖石在於江上余日與權友相爲倘佯以
作老夫歸休之所又占一聯○日余病卧不能起顧
謂舍弟曰暇者西征靡盬於王事往住玉蓮坊近
地者數矣而終未省拜先塋是吾平生所恨也今年
衰日迫尤致念於齊家一道而弼守之學業無所進
益陶潛責子之詩不其然乎莫如從吾所好鼓琴而

賦詩翌日責送河隈此缺一日弼守來報曰昨日京

耗直來先生行旆在今明間云矣越三日朝先生書

札來到問諸來价曰是札出於前月以下缺

對鳳菴記

余本兵家者流自齟齬不重觚墨之用工惟事弓馬
之遊戲射以觀德馳欲範我氣意昂昂於鄉堂步趣
逐逐於閭里如是過三十餘春秋矣至庚缺然有志
於究經講道之方乃相宜於洞之南九成峯下向卯
之區拓石而廣之伐木而敞之遂得數頃地經營八
九間棟宇而落之洽費三年之役顏其楣曰對鳳菴

樓於西架而名之曰聽韶亭於南間而題之曰來儀
統而額之於門曰省休齋其曰對鳳聽韶來儀者因
山名也曰省休者揭吾志也主乎九成而前對鳳山
南通翅舞而舞之若飛也似各呈其態實茲區之著
題目好光景也田於山中而食井於牖西而飲鑿小
塘于汙下而或芹或蒲築小壇於陡斷而外松內竹
柴於山而美可茹濯於泉而清可挹招一老釋守直
焉日往省楸而休焉讀焉亦足爲追遠養閒之具儘
潔地奇境也倘來昆之踵而脩之也耶是爲之記

上樑文

對鳳峯上標文

閱百劫而肇初基信得天慳而地秘歷四世而繼建
兆實賴鬼護而神休豐山古縣益陽新區烟雲蒼然
以深渾是物外真境界溪山窈而斯僻不知人間何
是非背九成而面鳳嶽喜聞虞殿之儀韶上鵞峰而
下魚嘉願學思聖之察理上棟而宇于下縱無暈飛
丹堊之雕粧傍室而堂於中可容蛾述青衿之棲息
谷通翅舞飄飄起胸中十分清洞種風生習習去面
上三斗俗壇有松芳塢有竹槩可見忠臣君子之持
堅籬種菊為庭種花亦足為詩家隱倫之成趣暮而

歸朝而往鷄犬之境相聞歲既終年既馳車馬之喧
不至時省時讀只是仙翁釋子之相從或水或山猶
有鹿友鸞羣之可喜右建習榭以來儀而成名左置
書樓題聽韶而揭號又此對鳳之額因山名而稱焉
別以省休之題明吾意而目者咏之一觴之一石軍
之蘭亭非耶詩亦宜棊亦宜元之之竹樓似也樹林
暢茂而陰翳樂禽鳥之飛還峯巒叅差而拱環喜兒
孫之羅列招枯禪而來守縱或似梵居關緇林而歲
脩不妨爲家塾統一區而管領儘覺山川之有主張
展三隅而廓清方見風月之增光影採於山而美可

如濯於泉而神益清而作而息而鑒而耕紫蓋之老
農或謂爰居爰處爰笑爰語丹厓之故人時逢茲頌
燕賀迺舉虹標東曉起推牕日已紅炙背先知君象
德光明萬國到天中西返照蒼蒼屋角齊野色山光
渾已夕雲邊倦鳥入簾樓南蓋蓋山光入小龕標外
居人知此否菊邊松下逕開三北一帶河源洛浦極
問道當年初飲河淵涵淳瀦固難測上晻藹青蒼只
可仰日月星辰昭載焉敞通扃牖我心曠下一脉泉
源去不捨晝夜工夫宗海流堂堂尊攘辨夷夏伏願
上標之後齋致誠莊門無俗累楸林密甬而繁茂特

感先靈之陟降在斯堂字翼然而崢嶸將見後生之瞻仰于是

遺誠

人之爲人豈有他哉惟學問是己學問之道豈有佗哉惟孝悌是耳上自帝王下至士庶莫不由學而興亦莫不由不學而廢其興廢之闕豈不大哉是以傳說教武丁有師古之訓太公教文王有敬怠之誠皆古聖人也陶潛有責子之詩韓愈有勸讀之篇亦皆賢智也而猶尚如是惓惓况閭里愚昧者乎吾嘗痛恨於墜緒畧涉經籍而世值板蕩馳心於弓馬之場

投身於矢石之所竟止扁裨之號而叨躡定畧之階
是尚謂振墜之為耶惟韋邦運再造掃除妖氛而歸
其於積歲奔竄之中汝不為豺狼之餌凍餒之尸而
奉汝母安逝於舊棲寢室韋則韋矣而手不親紙筆
口不近經史所謂朋儔不過是詆諧放浪者流矜裾
徒爾廝養何殊為父不教之過不無其責亂中不遑
之情雖勢所使而汝亦有父兄長上而孝而悌從何
出來乎人而無倫彛去禽獸不遠矣况吾大小家隔
江相離既不能以言語相通則必以文字為也汝與
吾七八載相離死生存沒兩地茫然而曾無一字致

問是可曰人理乎終焉如是則隔江之至親何以睦之歷世之先系何以明之汝父之師友何以知之是汝時日之急務而今日非晚此時可及勿謂來日明年函圖爲人之方吾嘗見厓爺雖在靡蠱之中誦鄒書一部於馬上三十里汝豈以不遑爲辭耶吾今年衰日迫縱難期見汝之成就汝亦有幾個幼穉兒猶可爲他日傳襲孝悌之資矣勉之勉之

晚休堂文集卷之二

附錄

傳來事蹟

傳來馬鞍馬勒卽先生別給之物而丙午火變時
盡八於灰燼中云。蒲巖卽公之釣遊之地而至
今爲來孫慕仰者耳。河回橋樑卽公請業往來
之路而先生慮朝夕厲揭之勞兩家創設而至今
父老傳之仍成役軍口碑耳。八旺卽公墓所而
當時先生擇送地師点定云。先生手札及取適
軒往復書滿載家籠而火變後只有缺幅紙畧傳

可恨。賊平後公退歸田里教子弟以忠孝約朋友於琴書或詠嘯於休堂或杖屨乎鳳寺以終晚年休息之樂而伊寺伊堂祇遺邱墟至今爲子孫寓慕者耳。公之先世自時雨洞移居于仁今大小家相距爲數十里常有通奇之事則必封書而家有大狗繫其頸使自往還而通之蓋此去道路無非巖逕水藪而虎狼咆哮之中微物猶能如此當日化及於物可知矣至今以狗崖傳之。九成峯下對鳳菴即公初建而當日省掃肄業之所也其追遠感時之作落成顏楣之述想有巾行之藏

而祇得此文二詩三於繇洞古笥中敗紙爛章何
幸得免丙午之火也正所謂鳳文一羽茲敢記於
玉洲亭重校之篇以寓不肖發潛之忱裔孫極東
謹錄

行狀

曰黃生河清河鱗河一等來見余流涕而言曰昔
我先祖晚休公服勞王家著有令績而尚闕狀
德無以傳示敢請余應之曰以晚休翁之卓犖而
無闡述文字誠慨然然余筆不足徵信往求當世
之立言君子河清等作而復曰願追念七載矢石

幕府陪衛之勞余即悵然謝之曰豈敢忘諸遂就
考其家狀及龍蛇事實敬覽而卒業焉按公諱貴
成字致章號晚休其先平海人鼻祖漢學士諱洛
中葉高麗金吾將軍太子檢校諱溫仁歷三世諱
庸大匡輔國謚忠敬生諱太白刑曹典書八本
朝贈右議政是生諱祐兵曹典書贈左議政
是生諱天縱歷三道觀察使諱希亮工曹判書諱
厚老錄事諱睢訓導諱文壽宣教郎諱從仕將仕
郎於公爲高曾祖祖諱孟春生員考諱熙孫通訓
大夫妣淑人義城金氏生公子益陽里第嘉靖戊

申十月十日也幼有異質個儻不羈纔齟齬已不屑爲小人學問家業中微思有以振發之而編業書鈔無所適意乃詣河上謁吾先祖西厓先生先生一見異之首授以周禮司徒之教公即服膺而躬行之自是日有所進庚寅春 朝廷遣使通信鶴峯金先生爲副使陪先生往餞于門外壬辰四月倭寇犯順先生爲體察命公佐幕府諭之曰君之出入我門下將二十載又知君忠義智略足以擔當大事故茲委任無以妻孥爲念益殫誠信共濟艱難也軍官非不衆多而耳目之任最難其人

君其勿辭公對曰當此板蕩之際孰無保軀命戀
家鄉之情而叨荷眷庇之恩無以圖報豈敢以艱
危之甚變其夷險之節雖智勇短淺無所裨益同
爲死生是區區之願也巡邊使李鑑軍潰于尚州
敗報聞車駕卽夜西狩先生扈從臨行謂公曰
以吾之故而涉險濱危至若斯耶公對曰職任雖殊
爲國一也委鋒死綏早已決了願無以賤軀費念
六月車駕向寧邊先生以接待天將留平壤
是日賊兵攻城急先生與左相及元帥登鍊光亭
有紅衣徒暗至沙岸亂發烏銃公卽以片箭射之

連發五巡所傷甚衆賊畏而逃車駕至定州還
幸宣川命先生守定州賊兵將掠倉穀露刀荷杖
四面坐集公上馬搭弓大呼突擊無不應弦而倒
一齊斬馘懸于倉街賊兵喪膽奔潰本營倉穀由
此得全龍川鐵山諸邑劫倉者亦熄時旱甚江灘
日淺先生慮上流失禦將議備邊之計左相尹公
斗壽言於先生曰李潤德難可倚仗獨李元翼可
任然亦恐有疎慮不如遣黃貴成使之并力於是
先生命公守大定江江邊有逃散之卒絡繹不絕
先生疑平壤不守使公往探之到廣禮院遇平壤

守灘軍聞賊兵夜襲王城灘兵使李潤德逃去平壤已陷遂馳報先生先生大驚即使公赴啓行在祖承訓之敗過安州也公以先生命持酒饌往慰之因勸勿退兵承訓自耻敗喪竟歸遼東時天兵將至糗糧無備先生謂公曰即聞龜城儲穀頗優而使民離散輸運無路君與洪宗祿俱往宗祿曾在龜城甚協民心云以君勇畧兼彼忠實固不難矣公遂與宗祿馳往龜城艱尋山路招集逃散激以忠義喻以利害曰方今天兵已到定州平復之期果將指日而所急者糧饋也本邑儲峙

輸運無路汝等亦王民也勿論品官與吏胥同心
輸致則當啓聞行在各酬勲賞矣於是自相招
集擔負連續不日而畢先生以痔疾不能視事者
累日症轉危劇公晝夜調護憂公泣私不知有身
及至復初方自解帶先生每與鶴峯先生往復書
牘而必使公金先生嘉公忠勤獎詡勸勉眷眷不
已十二月天將李如松等到安州先生將入見
公亦陪從及其相見初無一言袖進平壤地圖李
提督進圍平壤先攻普通七星門以大砲火箭發
之公急勸駱吳兩將左右翼擊賊兵遂不能支走

入內城亂發銳丸我軍與天兵多被害公告提
督曰彼入內城正如落阱之虎勢似盡劉而竊念
竄寇致死機不可測莫若少開走路以勦滅之提
督從之賊兵既遁提督上鍊光亭彈琴鳴鼓諸軍
帥畢會設宴陳樂次第奏凱時夜月明風旌正動
先生亟請指日進兵爲收復京城之計提督謾應
實無進意仍命公往監守灘軍行過江渚有杜甫
劍外之懷感吟一絕曰投筆操弓手亦高大同江
水正滔滔他時露布玉城下欲挽銀河洗此刀寫
呈先生先生微笑曰此時詩興誠不偶然古所謂

壯士而詩人於君見之矣提督將進兵呼公謂之
曰此距京城不滿二百里賊雖摧敗各處退屯者
其數難算且聞我之進必將要險設伏以圖馬陵
之詐君其先我偵探連續馳報時賊兵新退所徑
驛舍率皆空虛城邑亦俱蕭條先生移闕于兩西
觀察使催運糧草命公往督公星夜馳詣轉遞調
發員戴漕輸還到黃州書報提督曰黃州之粟盡
被彼掠其外各邑糧草俱已輸待軍前所經村邑
并無賊兵而坡端以東尚或出沒云此非小將之
所目擊竊念彼旣沮挫豈敢拒塞 天兵長驅之

路肆然屯結哉但中間有一嶺地勢險阻林木邃
密故使人探察則幸無一倭隱伏之患龍川以東
開城以西雖鳴鼓長驅不足慮也提督進兵既至
開城遽有遲回之意累日不發竟致碧蹄之敗提
督以家丁之致死痛傷不已猝發退軍之令先生
及右相俞泓力爭不得公乘間進告曰大臣之力
爭勢所當然豈可輕退以助賊氣耶且勝敗自是
常事願加三思提督默然良久曰吾之退屯將少
休以進爲計耳是日三營俱退渡臨津正月 天
兵將向京城水泮不得渡提督使人促造浮橋急

如星火先生倉卒得葛橋之策命牛峯倅李希愿
董章人民採葛輸運公亦與焉謂李倅曰民力疲
劇勢難威督莫如躬自先勞以慰民望遂與登山
採葛擇其最誕者而採之曰汝等勞於王事亦
已久矣第此飢困雖有子來之誠何以堪役於是
民人感悅力採不日而足輸致江頭先生即令絞
索堅柱施經兩岸撐緯遂成一巨橋大軍穩渡公
之忠義服人類如此所謂悅而使民民忘其死者
夫四月 天兵進復京城十月 車駕還都酬扈
聖勞賜公爵定畧將軍戊戌十一月統制使李舜

臣戰殉于南洋先生聞極驚動使公往代吊奠仍
治喪事公曾在幕府素與李公忠義相許情甚篤
至以故與其侄瑯芬等幹治喪具哀痛殊甚先生
從天將自湖返嶺復上京師至屏山舘公進懇
曰出沒戰塵已積歲年而曲加生成俾免償敗辜
今寒宇肅清山河再造功微酬厚叨荷寵秩感
祝之極豈敢控私而見今機務無甚關係願假微
喘歸老田里先生不許公又告曰俄聞家竒妻病
甚篤人命脩短固難預測特許一歸以伸情理先
生曰七年塵埃頭鬢共白偕來偕歸曾所相期而

情迫如此有難終挽臨路分袂豈勝惜哉既獲命
乃告歸提督提督請先生問之曰黃貴成之才畧
已多需用而料事頗優量敵甚熟難可受得其人
方今氛塵未盡掃何遽爾告歸也先生曰其家情
景有迫不得已故也遂拜辭于三灘津歸故廬令
人已疾草就而呼之舉目熟視而卒所居廳事爲
風雨所壞了乃築數間屋顏其堂曰晚休有詩里
門襟帶洛水江岸有巨巖名蒲巖蓋累世考槃之
地號爲釣臺至是更題曰晚休臺又慕先臺有詩
先生慮公揭厲之勞創造河橋秀巖棧道亦當時

所拓一日病甚顧謂弟曰往者西狂奔走王事

未遑恤私今事竣身退年衰日迫惟當省己寡過

肅齊家政訓養兒孫以謀貽後而弼守學業尚無

所進陶潛責子詩爲我準備也莫如從吾所好鼓

琴賦詩以終餘年可乎有遺誠招朋約弟時登對

鳳菴亦有吟以乙巳九月十日考終于寢先生命

地師占墳于八旺洞即風生洞負戍原祐令人嗚呼公

出處言行想多有可以傳示者而累經焰火不克

收保今所見存只是綴拾於煨燼之餘斷爛訛缺

靡所考據己丑以前全漏記載癸巳以後可取可

蹟者豈止行字充棟而畧存未詳戊戌歸休田里
是歲先生亦告老矣燕侍之際必多有言志之可
聞者而亦全闕焉可勝惜哉然何必盡鼎然後知
太羹之味全體然後識鳳凰之文獨恨忠勤勞績
昭載太常而錫號之 褒無聞於會盟之席或因
世級悠遠文獻無徵有之而未之傳歟抑當先生
辭勲之日韜晦而不聞耶勞而不伐公其有諸夫
令人宣城李氏子弼守展力副尉孫希陽希溥曾
孫忠建僉正春輔鶴通政陽出正義溥出皆業儒
餘不盡錄今來請狀者其十世孫也鄉之人士將

諫祀公以丙丁之禮建益陽書堂云通政大夫行校
理知製教兼經筵叅贊官春秋館記注官文臣兼
宣傳官豐山柳光睦謹撰

家狀

府君諱貴榮後改貴成字致章晚休其號也平海
黃氏漢學士諱洛爲鼻祖也中世有諱溫仁高麗
金吾將軍太子檢校是生諱佑精軍器少尹生諱
裕中門下侍中生諱庸大匡輔國謚忠敬生諱太
白刑曹典書生諱裕以孫希碩貴 本朝 贈左
議政生諱天繼歷三道觀察使生諱希亮工曹判

書生諱厚老錄事生諱睢訓導生諱文壽宣教郎
於府君爲高祖曾祖諱從仕將仕郎祖諱孟春生
員考諱熙孫通訓大夫妣淑人義城金氏以嘉靖
戊申十月十日生府君于益音里第生有異質自
齟齬卓犖有大節早受庭訓畧涉經籍而常以洞
里窮絕傍無朋友切偲之輔爲恨歲就鐵谷舊第
肄業間習弓馬以善射名壬申春登虎榜幡然以
奉先事親之未克誠孝學問見識之不足需用深
自警惕自是幹家讀書晨昏之節志體之奉無一
不適究經閱史博古通今不明不措凡於製述不

用工令而遇之則無不條暢時人稱文武備具量
度淵深氣宇肅莊謀爲精詳尊賢樂道隨所處而
周弘也是歲秋經始精舍於洞之南九成峯下首
尾三載功告訖楣於門外曰對鳳菴中曰省休東
西廡曰聽韶來儀而有記文及標頌蓋以禋薦之
有所而餘力講習之靜寂也與季氏取適軒公常
共省掃而遊憇之至於定省必共之友愛篤至通
訓公甚安之又築臺於洛之涯名曰慕先每春和
秋清之節登覽暢懷習射講劍携壘鼓琴以自樂
而取適軒公常先後之慷慨嘒嘒編業書劍無所

適意及通訓公服闋謁西厓柳先生先生一見異
之首授以周禮司徒之教自是氣量益弘德業漸
就隔江十里朝夕焉師事之庚寅春往拜先生于
墨寺洞京第時朝廷遣使通信日本鶴峯金先
生爲副使府君陪先生往餞于南門外先生每與
鶴峯先生往復書牘必使府君金先生亦殊遇之
常加獎詡壬辰四月又謁先生于京第時倭犯釜
山浦邊報甚急備邊司薦先生爲艤察使先生命
府君曰吾已受任於艱危之際責君以佐裨之任
勿卑小官無念妻孥共力王事同歸先生如何

君之出入吾門下已二十餘年稔知其忠義有兼
人之度且腹心之任最難其人君其勿辭府君曰
當此板蕩之時孰無保軀命戀妻子之心久蒙薰
陶之澤夷險一致素畜于血赤也智勇雖淺惟命
是從同死生於國家之急是所區區之願也遂許
驅馳是時巡邊使李鎰軍潰于尚州敗報聞車
駕即夜西狩先生扈從臨行謂府君曰以有一
諾而不避危險至於斯耶府君對曰職任雖殊爲
國一也推鋒死後早已決矣六月車駕向寧邊
先生以接待天將留平壤是日賊攻城急先生

與左相及元帥登鍊光亭有紅衣賊暗至沙上亂
發烏銃府君即以片箭連發五巡所傷甚衆賊畏
縮而逃車駕還韋宣川命先生守定州賊將掠
倉穀露刀荷杖四面壅集府君上馬搭弓大呼馳
射無不應弦而倒隨倒斬馘懸於倉街賊兵喪膽
奔潰本邑倉穀賴以得全龍川鐵山諸邑劫倉者
亦熄時旱甚江灘日淺先生慮上流失禦將議守
禦之計左相尹斗壽言於先生曰李潤德難可倚
仗獨李元翼可任而亦恐有疎慮不如遣黃京使
之并力於是先生命府君往守大定江江邊有逃

敬之卒絡繹不絕先生疑平壤不守使府君往探
之到廣禮院遇平壤守灘軍聞賊兵襲王城灘兵
使李潤德逃去平壤已陷馳報先生先生大驚使
府君赴啓行在祖承訓之敗過安州也府君以
先生命持酒餼往慰之因勸勿退承訓自耻敗傷
竟歸遼東時天兵將至糗糧無備先生謂府君
曰即聞龜城儲穀甚饒而人民離散輸運無路君
與洪宗祿俱往宗祿嘗守龜城頗協民心云以君
勇畧共彼忠實不難募集府君遂與宗祿艱尋山
路招集逃散激以忠義諭以利害曰天兵且至平

復之期固可指日而所急者糧饋也本邑儲峙輸
運無路汝等亦王民勿論貴賤同力輸致則當有
重賞矣於是自相招集繼續擔負不日而畢先生
以痔疾不能視事府君晝夜調護憂公泣私不知
有身至復初李提督進圍平壤先攻普通七星門
以火砲大箭發之府君急勸駱尚志吳惟忠左右
翼擊賊兵遂不能支走入城內亂發烏銃我軍與
天兵多被害府君告提督曰彼入內城正如落
羿之虎勢似盡馘而竊念窮寇陷死機不可測似
合少開走路隨發勦滅提督從之賊兵既遁提督

上鍊光亭彈劔鳴鼓諸軍帥會同次第奏凱夜深
月明風澹正動先生亟請指日進兵爲收復京城
之計提督仍命府君往監守灘軍過江渚感憤成
一絕曰投筆操弓手亦高大同江水正滔滔他時
靈布王城下欲挽銀河洗此刀寫進先生先生曰
此時詩興誠不偶然古所謂壯士而詩人於君見
之提督將進兵呼府君語之曰此去京城不滿二
百里彼雖摧敗各處退屯散伙者固難料及且聞
我之進心將要險設伏以圖馬邑之計君其先我
偵探連續馳報時所經驛舍皆空虛城邑蕭然先

生發關兩西觀察使催運粮草命府君往督府君
罔夜馳赴轉遽調發使盡輸漕運到黃州書報提
督曰黃州之粟盡被賊搶其外各邑糧草俱已輸
待軍前所經村邑并無賊兵而坡瀉以東尚或出
沒云而此非小將之目擊竊念賊既已挫沮豈敢
拒塞 天兵長驅之路肆然屯結哉然但聞有一
嶺地勢險阻林木邃密故使人搜探幸無一倭隱
伏之患龍川以東開城以西雖鳴鼓長驅無慮也
提督遂進兵既至開城遽有遲回之意累日不發
竟致碧蹄之敗提督以家丁之折損痛傷不已碎

發退軍之令先生及右相俞泓力爭不得府君乘
間進告曰大臣之力爭出於至誠豈可輕退以助
敵氣耶且一時勝敗自是常事願加三思提督默
然良久曰吾之退屯將少休以進爲計耳是日三
營俱退渡臨津正月 天兵將向京城水泮不得
渡提督促造浮橋急如星火先生倉猝得葛橋之
策命牛峯倅李希愿董率人民採葛輸運府君亦
與焉謂李倅曰民力疲劇勢難威督莫如躬自先
勞以慰民望遂與登山採葛擇其最誕者曰汝等
勞於王事亦已久矣兼此飢困雖有子來之誠何

以堪役於是民入感悅爭赴不日輸致津頭遂成一巨橋大軍穩渡如過平地應卒利濟之策大率如是也四月天兵進復京城十月車駕還都酬扈聖勞賜府君爵定畧將軍十一月統制使李舜臣戰殉閑山先生聞極驚痛使府君替往吊奠以治喪事府君素與李公忠義相許情甚篤摯與其侄莞芬幹治喪具哀痛殊甚府君陪先生隨天將自湖返嶺還上京師至屏山館進懇日出沒戰塵已積歲年而叻加生成俾免償敗今案字肅清山河再造功微酬厚叨荷寵秩感遇之極

豈敢控私而見今機務無甚闕劇願借微喘歸老
鄉里先生不許府君又告曰俄聞家奇妻病甚篤
人命脩短固難預測特許一歸以伸情理進家書
先生見畢曰七年矢石頭鬚共白同進同退曾所
相期而情迫如此有難固挽臨發分袂豈勝悵缺
既承命告歸提督提督請先生問之曰黃某之才
畧忠義已多需用而料事頗優量敵甚熟更難其
人方今妖氛未盡掃何遽爾告歸耶先生曰其家
情景有迫不得已故也遂拜辭于三灘津歸故廬
令人已疾革就而呼之舉目熟視而述所居廳事

爲風雨所壞乃築數間屋顏其楣曰晚休有詩里
門濱於洛崖有一巨巖名蒲巖蓋累世考槃之地
號曰釣臺至是更題曰晚休臺又曰慕先臺有詩
先生憲府君屬揭之勞創造河橋巖逕沙窟皆當
時所拓一日病甚顧謂弟曰七年風塵奔走王事
未遑恤私今事竣身退年衰日迫惟當省己寡過
肅齊家政教養兒孫以謀貽後而弼守之學業尚
無所進陶潛責子詩真爲我準備也莫如從吾所
好寓樂琴書以終餘年可乎有遺誡乙巳九月十
日考終于寢先生命地師占墳于八旺洞九成峯

下負戍原令人宣城李氏柎焉嗚呼府君當日負
笈之席矢石之場想多有答問之目制勝之績足
以範世俗後者而一自經火之後萬存一二焉正
所謂太羹之一臠威鳳之一羽也何必多乎哉倭
獻通而知其覘知有國而不知有身片箭突陣斬
捕勁敵隨機補闕不爲己有宣布慰喻民心悅服
偵探召募餉饋及期相機贊畫力挽旋麾當日諸
公之推獎晚景自娛之閑曠及其誨迪之齊整題
詠之餘暢固皆天得之性而亦豈非親炙觀感中
流出來也耶如是偉烈之蹟只載姓名於鐵券勛

錄而却漏於發揮同時諸君子之筆茲曷故焉府
君之詩曰軫悔無名出處塲於府君素畜底或副
焉而爲後昆無窮之憾則愈久剗滅不得者也子
弼守展力副尉孫希陽希溥曾孫忠建僉正春輔
鶴通政希溥生正義有儒行內外曾玄譜牒自在
不必盡錄焉鄉之章甫以祭祀之義建益陽書堂
於杖屨遺址不肖後孫守一泣血謹述

墓碣銘

題歟休晚休公諱貴成字致章氏平海來自唐諱
溫仁仕麗朝東來後爲鼻祖中世祖諱天縱官觀

案歷三道轉一世諱希亮承先蔭官工判四世後
諱文壽承議郎是高祖諱從仕中司馬諱孟春有
郎階是杜公祖曾考公之考諱熙孫爲儒行階通
訓妣京氏生某年猗歟公有異質志倜儻氣卓犖
痛衰替思振發業書劒心不屑從先進厓老門受
旨訣服膺焉敕躬行日有進壬辰夏倭犯順柳先
生當艱察獎忠義命佐幕賊搶攘上蒙塵適拜
師扈西巡命公隨誓同殉忠憤激遂委身闕山
路千里遠日星晦矢石亂從先生登鍊光賊暗附
亂鳥銃公抽箭發五巡發輒中賊畏遁從定州守

倉穀賊欲棄四面集公冒死突而擊矢所指多斬
馘虜奔潰免棄掠賴獲全龍鐵邑援兵至糧餉絕
龜城穀難輸納承師命公又往收散民諭以忠感
公誠遂纏續隨提督多贊劃平壤捷從公策軍機
密事旁午旣備禦又伺候伊誰任皆推公冒危險
忘死生碧蹄敗天師政欲退師事蒼惶諸公懇
曰不得公費誠挽歸轄更進兵復京城蒙勅爵定
畧將公載彊勞羈勒勩亂時多名碩獎公忠一辭
推亂幾定遽辭歸效忠勤謝功名考樂樂釣臺傍
顏其楣晚休堂教子弟脩家政考履歷學所推豈

無本得賢師師深愛念揭厲築河橋便往來乙巳
歲哲人亡命地師占竈墳八旺洞君子藏令人李
宣城氏負戍原寔合柑子弼守展力尉是生子伯
希陽季希溥并才行陽三男曰忠建武僉正繼騰
審次春輔趾白貴次又鶴通政資溥一男曰正義
曾玄下不盡記公之后極東南持狀述來請銘辭
不獲謹構荒豈或諛從實蹟不另銘詔後屬百世
後戒樵牧真城李中麟撰

墓碣陰記

於乎定畧將軍黃公當萬曆壬辰之亂爲西厓先

生體察幕部效忠王事勤服主司之策載於麟閣
功卷而不詳於金管之筆何也生乎三百年之後
欲紀述功績不亦難哉日公之本孫極東甫以墓
有銘而無其叙來請陰記辭不獲按其遺狀而考
之貴成諱也致章字也平海貫也漢學士諱洛其
鼻祖也歷麗多顯官至 本朝有諱天繼三道觀
察使後世宣教郎文壽將仕郎從仕生員孟春高
曾祖也考諱熙孫通訓淑人義城金氏嘉靖戊申
生公公自齟齬氣槩卓犖不墜弓馬世業兼治儒
術文武備具壬申登第西班謁西厓先生先生大

加獎飭授以周禮司徒之教誡以出身事君之道
由是感激益知義理之輕重壬辰拜先生于京時
倭大舉入寇先生謂曰吾知君素有忠憤不於此
特效之乎且吾當軀察之任君其留幕裨佐也是
時巡邊使李鎰敗于尚州大駕播遷先生扈
從公不以危難辭之隨行至平壤江邊有紅衣賊
暗發烏銃卽以片箭殺傷甚衆賊乃遁去先生受
命守定州倉穀爲賊所掠去公乃上馬搭弓突擊
無不應弦而倒斬首懸街倉乃得全時天旱江淺
先生謂諸將曰可不預備守禦於灘乎遣公與之

共守大定江江邊有散亡流卒知平壤已陷歸報
先生先生使之馳啓行在日夜望天兵而糧
餉尤急先生謂曰君與洪宗祿往龜城輸致儲峙
于定州嘉山俾免窘乏之患也公受命卽行曉民
不日而運矣已正月天兵之攻平壤也李提督
攻普通七星門駱尚志吳惟忠左右翼擊賊遂走
入內城公進奏提督曰彼入內城政如落阱之虎
非無盡捕之勢而窮狗有反噬之理不如少開走
路隨機剿滅提督從之平壤既定將進京城提督
謂曰沿途芻糧自是體察所指揮催督諸邑因夜

馳赴使之輪待軍前遂進兵臨津冰泮不可渡先生令牛峯倅李希愿董民採葛公與之俱運致津頭遂爲浮橋濟焉四月乃進復京城十月大駕還都酬 扈從軍功公蒙爵定畧將軍戊戌統制使李忠武公中凡戰殉公奉先生命赴吊復進曰自亂離來今七年惟先生是聽死生不避今宇內稍淨願歸終於家先生許之歸鄉里築數間屋堂曰晚休臺曰慕先與弟取適軒公諱漢成倘佯於斯以琴書自娛以教迪子孫爲事乙巳卒于家葬于九成峯下負戍原合封配宣城李氏子弼守展

力副尉孫希陽希溥曾孫忠建僉正餘在譜牒茲
不復錄後生花山權準義謹撰

晚休堂傳

公諱貴成字致章號晚休平海人也漢學士洛東
來新羅爲黃之鼻祖金吾將軍太子檢校溫仁門
下侍中裕中大匡輔國庸世顯於麗朝逮本朝
祐以貽謨贈左議政天繼以底績歷三道觀察
奕葉珪組爲國著姓累轉至生員孟春其祖也通
訓大夫熙孫其考也公生有異質卓犖有志節受
庭訓博極墳典兼嫻鈴韜壬申捷虎榜幡然警惕

而與于學發爲文輒條暢人稱文武兼才小技書
劍無所適意慷慨嘒嘒乃謁西厓柳先生請益一
見異之首授周禮司徒之教自是感奮德器日進
壬辰往拜先生於京邸時倭寇傾國犯奎山邊報
甚急朝廷授先生體察使摠治戎務先生命公
曰吾受任於艱危腹心之寄最難自君出八吾門
稔知其忠義屬以佐幕之任勿卑小官戮力王事
同歸死生對曰蒙薰炙久夷險圖報血赤素蓄敢
不惟命是時巡邊使李鎡潰于尚州申砬敗忠州
大駕西韋公隨體察扈從待天兵留平壤

賊迫城烏銃亂發公以片箭連發五巡前隊俱倒
賊驚退車駕韋宣川命先生守定州賊將掠倉
穀露刀倚杖而四集公大呼馳射無不應弦而倒
乃懸馘於倉街賊喪膽奔潰穀賴得全龍川鐵山
諸邑劫倉者聞風亦熄時旱甚江灘淺先生慮上
流守禦左相尹公斗壽曰李潤德不足恃李元翼
難獨任不如遣黃某使之併力乃命公守大定江
見逃卒絡繹公往探至廣禮院聞賊襲王城灘李
潤德逃去平壤已陷馳報驪府即使公赴啓行
在祖承訓之敗過安州也持酒往慰因勸勿退承

訓耻其敗竟歸時 天兵將至糧儲未充公奉體
府命與洪宗祿往龜城督運而人民皆離散公招
集逃散激以忠義喻之曰 天兵且至平復可指
日而糧饋取急汝等皆王民也盡於此時盡力國
有重賞不汝欺也於是民悅服擔負繼續不日而
畢十二月提督如松等到安州先生入見必命公
偕提督進圍平壤先攻普通七星門以大砲火箭
震之公急勸駱尚志吳惟忠左右翼擊賊不能支
走入內城公告提督曰賊入內城正如落阱之虎
不難盡殲而窮寇陷死機不可測似合少開走路

隨其動剿滅提督從之賊果遁群帥會鍊光亭鳴
鼓奏凱咸請指日進兵收復京城提督謾應仍命
公監守灘軍過江感憤有吟曰授筆操弓手亦高
大同江水正滔滔他時露布王城下欲挽銀河洗
此刀先生覽之曰此時詩興誠不偶爾壯士而詩
入於君見之提督將進兵謂公曰賊聞我進必要
險設伏君先往偵報疆府闕兩西催運又使公馳
督公因夜調發付漕還到黃州報督府曰黃州之
粟被賊搶餘邑儲俱輸軍前而所經并無賊兵坡
湍以東尚或出沒云而非小將目睹念彼已挫沮

宣敢拒路屯結哉癸巳正月

天兵將向京城江

水流漸提督督造浮橋以進軍先生倉卒得葛橋
之策命牛峯倅李希愿火急董役公亦與焉謂李
倅曰民方飢困不忍威督躬先採取民皆自勸不
日山積卽絞索豎柱施經撐緯須臾橋成大軍利
濟如過平地四月收復京城賊皆退據嶺海之間

十月

車駕還都酬

扈聖勞授定畧將軍統制

使李公舜臣戰沒閑山公承體府命躬吊奠併治
喪素與李公意氣相許盡心護喪以歸因陪先生
從天將措置軍務於湖嶺而還京行至屏山館

八懇辭佐幕任而告歸曰家宇再造畧效羈勒曲
荷生成免得債轅願丐殘喘以歸老旣得請過辭
提督提督曰黃京之量敵制勝已稔其才畧與忠
義矣賊未盡掃何遽歸也嘖嘖不已遂浩歸故山
治考槃室扁曰晚休鷗鷺尋盟雲霞共樂嘗有詩
曰傍人勿謂將軍某韜晦無名出處場蓋志其素
也時先生又謝事歸烟波十里架巖設橋源源相
招公嘗語李君曰七載王事未遑恤私今事竣而
身退日又迫焉惟當省己寡尤整家訓兒從吾所
好以終餘齡乙巳九月終于家窆在九成峯下行

路指點曰此故將軍黃公之藏也於乎公忠勤之
篤韜畧之敏爲天將之所推重諸公之所稱獎
而被遇於平昔師資祭戟之門激昂自奮夷險一
致其所鳴弦懸鼓而倉粟賴全義諭離散而餉饋
完集勸祖帥而勿退激駱吳而齊奮開走路而出
竒如神偵敵情而覘機指掌辦兵家勝負於元戎
而弭其內顧擔葛橋利涉於艤府而應其倉卒軌
勒湖嶺而不曾伐勞角巾歸山而益自韜晦蓋其
天畀之固有而亦薰濡之所不可誣也然以若才
畧不曾著績於專麾制勝之場而逡巡於執爨之

列贊畫輔翊充闡其再造之元勛戢鬻歛翮養佚
於猿鶴之羣而惟將孝悌學問作爲家計旣自餉
老又貽孫謨至今炳然人耳目其弘猷偉度尤非
竊啓之所可容喙也猗歟盛哉微諸三不朽可得
無傳乎公子弼守孫希陽希溥曾孫忠建春輔鶴
正義皆趾義承烈簪組不替椒醑並衍福於鄉邦
矣竹溪安宅鐫謹述

記事後叙

豫章之材必生於江南簫雲之驄必產於冀北蓋
其毓靈鍾氣自有其地而必竟匠石視之作爲棟

樛伯樂過之拔其驥騏若使世無良工具眼則干
霄之質千里之逸吾恐其虛老於深山冷壑之中
矣今平海黃公其人也當龍蛇之變嘗爲西厓柳
先生佐幕其贊畫經綸協諒定畧不啻如平原之
李同巡遠之霽雲而方其漆齒長驅八域瓦解江
淮堡障危如一髮時柳先生爲國重任薦擢才俊
如權元帥李忠武爲水陸大將如辛慶晉洪宗祿
爲贊軍從事應時需用各當其才如公生長鄰里
夙知素畜暫不離於營府之間凡有緩急與定籌
畫而杜敵奇策多出其手倩命採葛臨津之浮橋

忽成急馬守城定州之倉穀賴完匹騎倉黃尺劍
橫行雖蹈白刃裹馬革直受之而無怨悔故其詩
曰投筆操弓手亦高大同江水正滔滔他時露布
王城下欲挽銀河洗此刀先生戲之曰君可謂壯
士而兼詩人此豈但千金之褒貶而當日城中忠
壯之士想膽青髮豎而激勵者矣嗚呼忠武公南
海一捷實係我國之存亡閱顛而使凶寇氣挫
海神鼓舞及其星隕南營哭拜振海此何等危地
急境而先生命公代奠替哭收屍治喪能使搶攘
之路善護旅櫬則公樹立之勛於是爲大而其臨

亂不避之勇槩可見矣獨惜其微秩下班功績未
澈遂使百世英名湮沒於石室丹書不識顏真卿
何狀乃爾者政爲公發也日後孫鍾呂鍾義持一
卷集而示余乃將軍壬辰記事而與先生懲盜錄
詳畧有少異重值鬱攸百存一二缺章斷句文理
不屬而遑遑有吐氣成虹驅風破浪之勢記法亦
有條理深得史家體真當時并用之材器而柳先
生能得士矣公平海人諱貴成字致章晚休其號
也英爽不羈膂力過人先生同患難於壬辰遂成
大績噫公之智勇膽畧雖有素抱者而若非先生

識人之鑑迥出尋常豈能如是薦拔哉昔太史公
叙伯夷傳曰士非附青雲之士烏得施於後世哉
吾於晚休公亦云安東金宗洛謹叙

又

昔李左車佐成安而成安不聽而敗歸韓信而韓
信用之而勝夫爲佐者可佐而佐之功可成得佐
者可聽而聽之事必遂若黃公可佐而佐之功雖
欲無成胡可得也若柳先生可聽而聽之事雖欲
無遂不可得也粵壬辰倭奴入寇其將清正習兵
多智其鋒不可當自釜山縱兵遊擊過密陽漆谷

等諸州 上遣申元帥使備島嶺而留屯於忠
州彈琴臺下人說曰何不據島嶺之咽喉而複屯
於此砦有輕敵之意不惟其言之不聽引斬其言
者卒遇賊軍九超而死於賊不可佐而佐所可聽
而不聽則其敗也其死也大率如是矣公爲西厓
先生佐幕言聽而計用則可佐者莫如先生可聽
者莫如吾公遂與先生結爲同死生之義殉身立
節其所固有則智謀勇敢之絕人者亦末節耳遂
冒萬死蹈白刃叅謀贊畫無所不到唐將之來也
以先生命採葛藤而成橋喻義散民運藁糧而繼

餉片箭殪賊搭弓保倉其勇敢則賁獲不能前矣
指揮則蕭曹亦自失矣爲國荷殍之義欲挽銀河
之句一出於斷斷危忠則先生之得公實明鑑也
及其孝忠武之死敵也奮身勇往與其侄二公善
護襯於干戈閃鑠之中于斯時也苟無一義字存
乎中安能投身於萬死之闕頭耶所有者 國家
也所慕者先生而已遂平倭亂棲息于蒲巖之上
往來于河隈之村爲 國家同心力蓋與先生一
體之人也後之人義而慕之議立俎豆之所遂起
益陽書堂公之於先生亦一兵仙之左車而泯沒

於草野之中自 上無褒典之下施者曷故焉其
如子孫之不振何花陽人至今稱晚休公云南原
尹玉鉉謹叙

書行狀後

昔在龍蛇之變材猷智能之士雲合雨集以成中
興之烈若其執國命受主知出入捍衛爲世宗功
者尚矣至於拔草澤之中乘一陣佐下風者亦
皆傑然寡儔如鄭公忠信諸公末尤奇偉卓犖赫
赫在人耳目余每歎息想仰以爲人材之生固自
不數非種種可得況此輩人之秉期應運崛起奮

跡一之已絕異事豈并世而復有也及得柳侍講
謙叟所爲晚休堂黃公行狀而讀之噫何其似也
又何其多也然而獨不得與諸鄭二公比例名躋
勛府廟食下土而終身靡盬於王事累立大功及
其寔字肅清浩然而歸竟不及於盟府之席又何
其不幸也公早遊西厓柳先生之門至壬辰特爲
先生所獎拔六年之間常侍左右與贊籌謀一似
錦南之於白沙公及其歸鄉語不到其時事益自
脩飭如儒生朝夕問業於河上晚又創設家塾訓
誨子孫泯然自混於農翁學究之間見之不復知

其爲昔日鈐鞬中人於乎此其所以懷材如諸鄭而成功不如諸鄭也然抑不知使諸鄭如公之不幸則果可以能此否也而迺今顧猶以顯晦崇卑爲亡人世諦之論則固淺之爲知公而亦甚非所以承公之遺志也聞其後人能復修公舊業恂恂多可士苟由此而不怠擴之異日者國有緩急終必賴之安知不有幾諸鄭受羸叔報大幸其不幸也是在後人所自勉如何耳於乎其尚念之而無求多於文乎哉通訓大夫前行弘文館校理知製教兼經筵侍讀官春秋館記注官文臣兼宣傳官

晉山姜晉奎謹書

又

大凡荆山之玉不泣則璞而已冀市之馬不顧則驚而已物之顯晦猶有其時況人乎公以卓犖魁
兜之質早遊於幹韜之林論議謀猷爲衆所推孝
友之篤忠義之勤特公之大節弓馬之鍊達詞章
之條暢是公之餘事餘皆類推而知也公於壯歲
值國陽九之會柳先生獎拔於荆山冀市之外羅
致之左右公不避艱險而進退周旋於矢石交攻
之間堂堂之旗井井之陣龍戰虎鬪雖千萬人中

必往而少無前却之意射殪却賊斬馘甚多及其
亂已寔宇肅清山河再造遂旋歸廬可謂大丈夫
之能事畢矣余後公殆三世紀餘年于茲公之豐
功偉烈聞而知之熟矣每恨不搆衣於鐵谷九成
之下一叩其緒餘而趨於下風豈不爲志士之所
慨歟乎余於公之香燦世不遠千里袖公紀德之
狀而來請其弁文余乃接而三復之如見公當日
豪爽之風俊偉之氣而其樹立之赫赫照耀于世
者是誰之賜若非先生之獎掖而老於牖下則未
免荆山冀市之璞與鴛而已名何以益彰價何以

增倍余故曰先生之於公謂之以和氏伯樂可乎
嗚呼公之事業宜乎勒之燕然圖之麟閣猶屬歎
后況百世之下實行名績其將泯泯於黯黹黷昧
之中矣但爲後輩之傷痛哉余難孤負慈孫之勤
意敢忘猥越畧綴數行而書于尾後學德恩李鍾
晚謹述

益陽書堂開基祝文

于支幼學黃碩老敢昭告于土地之神於惟我祖
俊偉夙聞九齋佐幕勛府殊典瞻茲仁溪仰慕遺
躅龍蛇過劫猿鶴悲矚爰例祭社敢忘薦縉雲仍

中替迺懼不振課農遜學坯璞真淳載謀書察教
迪來裔諒爾匠工敷彼松桂相地于此敢告神明
洋洋默佑俾克有成縣監豐山柳祈睦

益陽書堂移建記

國朝歷年長士大夫氏分族析傳次至數十世矣
其世襲軒組光寵隆赫爲喬木巨室者中外相望
而澤漸祿微降在皂隸者亦何限哉有能於式微
之中保其門戶使人知爲名德之裔得列於士大
夫之林者皆文學之力也人物至繁爵祿至貴若
必待爵祿而後稱爲士族則世之衣冠者鮮矣且

顯達而不學則入於衰靡衰靡而學則進於顯達
吾不知爵祿文學孰爲重輕也安東之府益蔭之
里黃氏居焉其先祖晚休堂公有文武村畧龍蛇
之難佐西厓柳先生勞績弘多余考其家乘亂時
事有足徵信可以補史氏之闕也晚休堂濱江而
圯於水聚族而謀就爽塏建書堂以申桑梓之慕
又使宗族子弟讀書隸業其中甚盛舉也嶠南東
國之鄒魯也安東又嶠南之閩閩也鄉學家塾講
誦相聞而益陽書堂居其一焉黃氏子弟樞深先
懿薰陶善俗誦士大夫之言修士大夫之行是乃

士大夫已矣何必以名位云乎哉吾聞嶺人士勤
儉篤實志一立必底於成信能歲修於斯胥告胥
誨日進不已則又安知名位不從此出乎黃君極
東從余求堂記館於外而朝夕焉其意肫如其辭
藹如可知爲書堂中人也黃氏累世不競若無以
自立余故推本探源以明人家之興罔不繇學其
廢罔不由不學苟不以余言爲妄則書堂之設其
黃氏重恢之基乎通政大夫承政院右承旨兼
經筵叅贊官春秋館修撰官完山李應辰書

益陽書堂重修記

益陽書堂卽晚休黃公晚年歸休之所而後之人
謀祀公丙丁而建也公之詩曰晚休臺上晚休堂
題扁晚休也不妨其志尙可知也公以卓犖奇偉
之資濟以忠憤慷慨之性當壬辰危亂之日從事
於我西厓先祖佐幕周旋捍衛協贊籌略靡不用
極不以家累爲念隨我先人多所籌畫如散亡之
招集糧餉之不絕採葛而成橋急馬而冒陣臨機
設計暗合於古人用兵之奇豈非智慮之過人而
忠義之感激也哉及忠武李公之殉于南洋也以
先人命護其喪而來祖承訓之敗過安州也以先

人命持酒饌往勞之行過江渚夜吟一絕曰投筆
操弓手亦高大同江水正滔滔他時露布王城下
欲挽銀河洗此刀亂定後車駕還都次第賞功
盟府之丹青煥然而公則已歸家矣竟不及於諸
臣之列豈非盛事之一慨耶一區益蔭遂爲終老
之計逍遙倘佯於巖壑林樾之間日與朋儔暢懷
嘯詠作昭代逸民教育兒孫垂裕後承種德于躬
責報於後者非公之謂耶公之所著詩文重八於
鬱攸韋以存者僅一二而殘缺甚矣近所搜得於
他方者又若干篇猶韋其不幸也今去公之世三

百餘年颯爽之姿經綸之業不可得而復見而惟
是堂扁舊楣亦可以想像遺躅之不泯也歲久頽
圯累毀累新今又改建仍舊制構六間而東西爲
煖室中爲堂改扁以益陽余亦一再登覽愛其地
僻而事簡宅幽而勢坦雖乏軒暢宏大浩汗縹緲
之勝而亦足以棲身隸業之地今其諸雲仍方裒
拾零言片簡之流落人間者欲登于梓而先以堂
扁之記託不佞以傳示于後不可以無文辭且念
吾兩家之契其有異於佗人而前此縣監再從堂
叔父承宣三從叔父皆有述不必贅焉前都事豐

山柳道嚴謹書

益陽書堂落成

東萊鄭翊朝

地勢遶迤鍾氣浹將軍逞躅誦傳今鶴巢廟栢精
靈古龍喚波灣壯蹟沈八載軍功期皓首三長史
筆溯丹忱一盃笑指仁川水恨未當年共誓心

又

朴端會

傑氣盤迴古洞深將軍忠烈昔猶今仁山鬱鬱遺
風在洛水滔滔壯蹟沈林園桑麻知課業蒲葦日
月願輸忱依然舊址新標起勉爾雲仍各體心

在昔龍蛇之亂有卓犖忠烈之人卽晚休黃公
是已嘗爲西厓先生佐幕其貞忠大義炳烺國
秉猗歟盛哉將軍鍾得山河之氣範圍江海之
量不憚夷險周施果毅幾蒙鉅公之推詡羽檄
旁午累被 天將之獎勵英莽上徹特加 寵
秩且有詩曰投筆操弓手亦高大同江水正滔
滔此實公蹈白刃莫青華之一大樹勛也其可
敬也夫畧叙平日所感于中以附篇末焉

又

安東金基洛

洛水滔滔劍氣淡名區從古有仁今蒲巖印月千

秋照埤幕英風百世沈壯蹟八年多士感遺宮半
畝後孫忱瓊衿玉佩聯翩地自此溪山若有心

又

安東金炳瓚

兵家遺澤八人溪邈矣揄揚幸在今籌策可堪千
里決功名何故百年沈莘楣題額仁川號幕府收
勛壯士忱若使茲堂褒一世輿情熟不動其心

又

宣城李漢舒

玉山之下谷幽深壯士遺芳煥古今青海吐虹看
氣像銀河洗劍自升沈經綸已許賢公幕壯畧能
圖賊世忱烈烈英風彤史載仁川莘楣想忠心

又

安東權範五

古事蒼茫歲月湮將軍遺蹟煥仁今荒泉應不靈
魂滅碧海寧終壯蹟沈賴有雲仍明世德莊傳日
記炳孤忱嘉然盡閣藏修地刺得來生慷慨心

又

順天金性舜

王岫巖巖洛水湮將軍遺蹟古猶今河橫北極詩
多感星隕南營淚欲沈劒洗妖氛懷壯畧幕隨賢
相欬貞忱依然舊址新薨起爲賀雲孫體祖心

又

安東金輔均

定畧聲名景慕深當年遺事拊傷今龍蛇變掃英

風凜弓馬材還壯氣沈裨佐從者多畫策褒崇何
漏效微忱晚休仁里高堂上祇見烟霞棲息心

又

豐山柳安祚

水繞玉山窈且深晚休遺址里仁今英才有是賢
公佐文獻無徵壯蹟沈五丈秋營星隕淚三巴夜
壘斗依忱回看新構堂成地爲賀雲仍築以心

又

坡平尹汝璡

洛水奔流入海深將軍遺事古猶今張公治蜀像
爲助裴相平淮碑不沈籌贊西厓蹈白刃身隨北
闕老丹忱肯堂此日從遊意益勉君家世世心

又

安東權 璫

王崑山村畫閣淡龍蛇風雨百年今賢公幕佐憂
朝暮老帥櫬還淚陸沈夜覘劒花干斗氣秋生壇
血向葵忱堂堂椽筆將軍蹟百世難忘爲國心

又

安東金致均

晚對樓前一曲淡依然佐幕復仁今銀河洗劒詩
思切喬木春殘歲色沈廣拓遺墟追往蹟修莊寶
墨仰微忱虹樑數闕兒郎偉惹起來昆計後心

又

德恩李鍾玉

九成峯下一堂淡赫赫忠靈百歲今江日昭森腥

兩歇海天空濶瘴雲沈育英卽是相承業庇雨須
看永慕忱講世神交知有別悠悠千里照冰心
堂堂忠節八人深閭巷歌謠頌至今海岳平分祥
旭出鯨鯢一去怒濤沈矢石八年成白首絲綸當
日表丹忱江聲動地如相聞不盡英雄報國心

又

宣城李天裕

盤迤山村一閣深當年擇處里仁今魁姿已逐孤
星降壯蹟那教壁月沈舊砌蒼茫多士感新甍突
兀後孫忱萃楣共張如椽筆描畫千秋不死心

又

仁同張旋矩

屏山之下宅幽深魁卓英風互古今大海葛橋千
里裹銀河劍氣百年沈却看秋葉凌霜戰猶有園
葵向日忱何章雲仍堂肯構恭惟千載感先心

又

安東權世復

華之東谷谷之深往事蒼茫說到今積水橋浮
天救至明河劍洗海氛沈嚮非賢相知人哲誰識
將軍報國忱上有塚云堂是下寄詩遠勉子孫心

又

昌原黃定夏

洛水東邊錦里深將軍已古跡猶今賢公幕府紆
籌策義旅江山濟陸沈千載有關多士議數間肯

見仁堂文集卷二
三
搆後孫忱伊來講罷同宗誼倍覺生平景慕心

又

宣城李宅震

萃岳崔崔洛水深篤生英俊里仁今風聲北陸箕
城奠功業南天斗氣沈再造山河賢佐策六間堂
宇子孫忱衿紳盛會葵情菟爲把觥籌勉爾心

又

安東權宗復

披書相對感懷深却恨人間有古今定郭倉爲糧
道給臨津波不葛橋沈風雲裨佐西厓策星日遙
懸北闕忱堂下仁川川上月千秋洗出戰場心

又

昌原黃祖夏

山益峻兮水益深將軍遺躅昔猶今廣於善射非
無遇預從爲碑奈永沈當日弓刀賢相詡芳辰樽
俎後人忱擇仁而處休名室勉爾雲仍體此心

又

豐山柳善榮

堂仍舊宅巷園深物色蕭然異古今竊林虎去風
如嘯暮渡橋橫雨欲沈偏增志士登臨感多賀肖
孫肯搆忱龍蛇盛績垂青史想像當年佐幕心

又

玉山張紀淵

院宇荒涼洞府深想來前事感於今禪垣老竹春
空綠戰島殘花雨半沈知有肖孫營別業更無賢

相識真忱龍蛇往迹渾如昨入室采增景仰心

又

奉化琴東烈

厓老門庭旨訣深魏勛卓節炳如今西江劒洗元
戎卧南國琴懸正韻沈蠻觸乾坤回大御龍蛇
風雨獻孤忱益陽自是宜休地鼓我東人不死心

又

英陽南極泰

陶山流水玉淵深其下仁川不捨今日月昭光登
畫閣龍蛇往劫向葵忱幽潛實德寧無聞煨燼餘
編久恨忱聊憶當年多慷慨尊周誰有斥秦心

又

青松沈東變

先生德教八人深麟閣聲華卓古今闡拔在公時
早晚行藏由命或升沈世交旣洽充河量儒論曾
營祭祀忱始克構堂樑頌侔從茲無憾未遑心

又

後生密陽朴善夏

羽隊驅馳八載深角巾歸第業垂今盡忠幕府神
籌運濟亂縹區大陸沈韜晦溪山先祖武經營堂
室後孫忱落成六偉詩賡和興起書生曠感心

又

德水李敏圭

鳳山陡起浴江深鍾毓如公絕古今世值龍蛇勞
智力身隨鷗鷺任浮沈林園歷歷遺風韻葵藿亭

亭向日忱錫類賢孫能繼武雲霄曾與許同心

又

宣城李在湜

龍蛇造劫歲華深定畧崑勛說到今西渡河橋寒
月照南阡墓樹暮雲沈朱褒彤筆千秋恨克復青
邱一片忱籩豆遺墟歌六偉賢昂不替通追心

又

豐山柳時萬

一壑園林窈復深舊墟書塾更輝今重回列岳華
西近迥隔喧塵劒外沈積苦八年多贅畫成功九
仞費誠忱龍蛇造蹟無憑處洛月高懸萬古心

又

宣城李會稷

風雨關河憂國淚如公不死百年今陪從魏閣尊
師訓贊復種墟免陸沈無伐魏功餘白首晚歸遐
土炳丹忱臺仙已去乾坤暮往事悠悠空歎心

又

宣城李驥烈

天將當年獎許淚炳然偉蹟海東今鎮倉灞驛師
糧給護親閒山劒月沈花石成庄來裔慶豆籩遵
禮後生忱肯堂繡梓詢謀叶倍切冥途景仰心

又

豐山柳承佑

松桂蒼蒼洞府深晚休古宅至于今龍蛇體使英
才用羽翼從軍事蹟沈闡發幾勞賢士筆搆堂亦

見後孫忱斷橋復續來斯醉流水行雲主客心

又

豐山金東弼

爲國當年贊畫深史傳定畧到于今記惟信筆文
茲在事係軍功名不沈舊廟遺基多士感新椽肯
攜後孫忱一江明月烟霞裡刺得溪山物外心

又

宗後生範麟

古基新構一堂深定畧偉功頌至今叔武公屍歸
善護橋臨津水濟無沈名垂籌策從仙意計進連
環退讀忱鄉士議營蓬豆所聞先惟在子孫心
我東龍蛇之亂比楚漢之八年而尤有險焉

荆益之二州而倍有危焉公不憚危險爲西星
柳先生佐幕壯猷奇策多出其手當時樹立之
勲可謂不世而事蹟未敝英名湮沒豈徒雲樓
一劫文獻無徵也哉本鄉士君子議建俎豆之
所堂宇新落而有韻余於百世之誼畧叙如右
以寓感慨也

又

宗後生憲周

古梓新薨一巷溪公車千牘少如今功名麟閣晨
星耀憤淚龍灣夜月沈海陣暴來忠武魄袖圖賢
進相爺忱平沙十里留鴻篆感却達人歲暮心

公遭龍蛇兵燹之世經綸事業贊畫拯濟有足
輝映於朝野而名姓但見於麟閣文蹟泯然於
彤筆實爲子孫之餘憾鄉之人士議建俎豆之
所堂宇新成落而有韻余於百世之誼畧叙欽
仰慷慨者如右

又

宗後生建周

將軍籌策海東浹百里仁川碧古今君子何煩功
伐矜英雄應不事終沈麟閣盡賢孫憾俎豆成
儀義士忱酌酒臨風花樹晚厓門當日誓同心

又

宗後生相瓊

神州憂與大同深蕩滌歸來頌至今鳳徽千年精
有降河橋一帶濟無沈紆籌極協陪從義投筆曾
盟扈衛忱突兀斯堂欽慕地也知章甫闡幽心

又

后孫景文

吾家遺恨水如深嗚咽仁川不盡今自墜汙流恒
漑漑未明幽德尚沈沈八年風雨從師義一部春
秋報國忱祭社經營儒論重數間堂宇秉彝心

又

后孫麟秀

攘却神籌幕府深人無左衽至于今先勞火堞倉
非乏唯命冰江葛不沈一諾尚存期皓首萬人猶

往湖丹忱堂成是日營勞公議置由好懿心

又

后孫景澤

一脉仁川去去淡龍蛇腥血滌流今七年勲績高山仰千里陪從大陸沉虔禮章蒙鄉士議闡幽祇在裔孫忱晚休臺上媚媚月留照先生眷愛心

又

后孫極東

混混河流深復深當年洗劍視猶今一定忠盟天日朗八年仇賊海氛沈懿德幽潛無盡恨孱孫堂構豈云忱兩家先誼虹橋在遂世相傳勿替心

又

后孫景周

吾家幽德百年溪闡美經營尚到今
早未承褒齊憾慨重逢回祿恐湮沈
詠謠多士同叅會樽俎佳辰寓慕忱
積累餘功堂始訖孱孫何以繼先心

又

后孫圭楨

仁溪科進玉淵溪不舍涓涓自古今
扈聖偉功曾有著從師重義竟無沈
風驅軒外龍蛇劫日曝書中狗馬忱
垣竹埤梧高數尺擬修邊豆後孫心

又

后孫中秀

一曲仁溪窈復深源流長溯百年今
編橋應急功猶著屏樹歸終跡不沈
師廟近墻陪侍義 王山

遙望扈從忱數聲櫟頌依虔禮此日誰無樂善心

又

后孫景昇

源遠仁溪一曲湊百年偉蹟匪斯今明時竹汧曾
何漏古渡河橋永不沈師廟近瞻羹慕地 王山
遙望扈從忱修櫟頌罷依虔禮恐負孱孫克體心

又

后孫煥默

寶鑑仁川活水湊沿流河曲達于今親承周禮尊
師訓克復箕墟濟陸沈祭杜亶由多士議構堂敢
謂後生忱孝忠自有先謨在只恐吾曹負此心

又

后孫德九

龍蛇已古史傳深先躅依然想像今倚馬出奇虜
輒潰成橋應急津無沈從師大義扶顛策殉國危
忠克復忱公議百年崇慕地孱孫懼墜適追心

又

后孫鳳起

經始落成歲已深當時餘韻尚傳今林園朝暮烟
霞僻花樹東西雨露沈軒豁堂門牕通素志恢弘
室抱丹忱惟吾宗族升斯者誰敢忘先各自心

跋

嗚呼此吾先祖晚休堂府君遺集也粵昔龍蛇之
亂有國來罔極之患吾先祖幕僚之遇有軍後不

常之會也七年鋒鏑八域瓦解 天步艱難危如

一髮危矣十載陪從一朝擢拔凡有緩急隨

機任使遇之奇矣機務之浩穰夷險之備經必有

悉於記載文字則雖衍字充棟不足爲多况於登

門之日先生首授以周禮司徒之教其答問授受

之要旨妙訣不啻若亂中幕府之補拾而吾家丙

午之火孽慘矣如千綴拾於灰燼之餘者僅存若

無可勝痛哉且有然疑難明者存柳判書豐安君

丙度勲府完文曰黃某豐功偉烈昭載麟閣柳相

國洛波公曰黃某三字載在勲錄柳禮安公開基

文曰勲府殊典凡天下之明文信蹟固莫重於國
乘而如是其章章昭著至於先生本集則不見焉
何詳於國乘而逸於彤管也誠不無後承之遺憾
而絕無所發明也府君之詩有曰傍人勿謂將軍
京韜晦無名出處場其韜晦之盟素所蓄積于中
也故未及酬勛而旋自告歸尚爾名垂鐵卷階陞
定畧者安知非當日公論之有不能掩者耶按以
懲忠軍中軍官一人軍官二人等語推之現有所
點斥而實有關於韜晦積茲潛幽重不在子孫之
不振歟旣晦而明理之常也河上食君子顧先契

之難泯會先生之亭祭先生之墓証以的據補其
脫簡正誤刪訛遂成完本豈但食君子出常之施
伏想先生冥契之靈必有所丁寧教詔也茲不避
僭踰之罪敢泣血謹識不肖后孫極東謹識

又

記曰先世有微而不知不明也不揚不仁也蓋之
則罪也噫惟我先祖晚休府君早登西厓柳先生
之門涉河昕夕薰炙最深壬辰之亂嘗爲先生裨
佐之任積苦贊劃克復東土當日師門之推心畀
托天將之嘖舌獎許觀於記事可詳之矣勲

府之定畧稟署寔出於曠代殊異而及其會朝酬
功之日府君已歸鄉第風霜白鬚黯晦撫謙其爲
後承之齋鬱痛恨果何如也竊伏念八載濟艱履
歷晚途養閑嘯咏必有充車行字足以激忠勇庇
昆裕而經燹飄散綴拾零存者只詩與書畧十言
及亂中日錄標頌遺誠各一篇而已幾百年珍襲
縹緗任之蟲蠹污噓政先微不揚之責無地可逃
安敢一語稱濫重添不肖之罪也哉常與族從極
東聚首憂懼遍求月朝家立言信筆擬之以鈐繡
壽其傳不幸人事遽謬景周亦瘞悴轉甚符到日

追苟若因循翫暢此莫之遂焉地下歸拜先父老
之夕將何以贖其逋塞其白也迺使族孫煥默及
家兒泰東叔寫二本點訛就整付諸印活亟圖竣
功以其力綿而事簡也書堂韻什重其士林公評
之意寓我諸宗通追之志載之卷尾畧叙顛末如
右不肖裔孫景周謹識

又

噫我定畧先祖遺稿荐經燹幽僅一冊耳竊恨家
世連替尚未收繕闡發而文詞乃府君之餘事當
時從師裨佐之責復國勞勩之蹟足以不朽我府

君之精神證響并付諸賢所撰今纔印布于世庶
可粗伸於先父老未遑之至意而不勝追感之私
不肖嗣孫燦鳳謹識

晚休堂文集卷之二終

